

आकाशवाणी

खबरां जगमोहन शर्मा कोला

पैहले खास-खास खबरां:-

1. केन्द्री मंत्रीमंडल ने उत्तर प्रदेश दे वाराणसी लेई जहार करोड़ रपे कोला मती 25
लागत दिएं दंडु एलिवेटिड राजमार्ग परियोजनाएं गी मंजूरी दिती ऐ।
2. रेल मंत्रालय नै रेल टिकट बुकिंग गी सखल्ला ते मता सुवधाजनक बनाने लेई
भारतीय रेलवे दी IRCTC दी वेबसाईट दा इक नमां सरुप तयार कीता ऐ।
3. भगवान जगन्नाथ-भगवान बलभद्र ते देवी सुभद्रा हुंदी रथ यात्रा अज्ज ओडिशा
दे पुरी च शुरु होआ रदी ऐ। राष्ट्रपति, उपराष्ट्रपति, प्रधान मंत्री ते गृहमंत्री होरें इस
मौके पर सब्भनै गी ममारकबाद ते शुभकामनां दितियां न।
4. अमरीका नै दावा कीता ऐ कि उन्नै होर्मुज जल डमरु मध्य च ज्हाजें दी सुरक्षत
आओ-जाई लेई ईरान पर हमले दा इक नमा दौर शुरु कीता ऐ।
5. फीफा विश्व कप फुटबाल च मजूदा चैम्पियन अर्जेन्टीना ने दुए सेमीफाईनल च
इंग्लैंड गी 2- कन्नै हराई दिता ऐ। हुन 1फीफा विश्व कप दे फाईनल च औंदे ऐतवारें
अर्जेन्टीना दा मुकाबला स्पेन कन्नै होग।
6. भारत ते इंग्लैंड बश्कार इक ध्याड़े आले अंतराष्ट्रीय क्रिकेट मैचें दी श्रृंखला 3
5 दा दुआ मैच अज्ज संजा साइडेबजे थमां कार्डिफ दे सोफिया गार्डन्स च खेइदेआ
जाहग।

Cabinet -Pragati

केन्द्री मंत्रीमंडल ने उत्तर प्रदेश दे वाराणसी लेई 25 जहार करोड़ रपे कोला मती लागत दिएं दंऊ एलिवेटिड राजमार्ग परियोजनाएं गी मंजूरी दिती ऐ। प्रधानमंत्री मोदी हुंदी अध्यक्षता आहली आर्थिक मामले सरबन्धि मंत्रीमंडल दी समीति ने वाराणसी च सड़क सम्पर्क गी बेहतर बनाने ते भीड़-भाड़ ते यात्रा दे समें गी घट्ट करने लेई इ'नें परियोजनाएं गी मंजूरी दिती गेई ऐ। इ'नें परियोजनाएं च उत्तर प्रदेश च राष्ट्रीय जरनैली सिड़क-19 ते वाराणसी रिंग रोड बश्कार हाइब्रिड एन्युइटी मॉडल पर 46 किलोमीटर कोला मता लम्मा ते कन्नो-कन्नी 6 गड़ियें दे लंघने आहला ग्रीन फील्ड एलिवेटर कॉरिडोर बनाना शामिल ऐ। इसी कुल 14 जहार 400 करोड़ रपे दी लागत कन्नै बनाया जाग।



PM Visit

प्रधानमंत्री नरेन्द्र मोदी होर कल पंजाब, हरियाणा ते चंडीगढ़ दा दौरा करगंन। ओ हरियाणा दे जींद रेलवे स्टेशन पर जींद ते सोनीपत बश्कार भारत दी पैहली हाईड्रोजन रेलगड्डी गी झंडी दस्सियै रवाना करगंन। मोदी होर जींद दे एकलव्य स्टेडियम च 14 जहार 700 करोड़ रपे दी लागत आहली कैई विकास परियोजनाएं दा नीह पत्थर रखगंन ते कैइएं दा उदघाटन बी करगंन। मोदी होर चंडीगढ़ च कल दपैहरी सेहत सेवाएं, शिक्षा ते सड़कें दे बुनियादी ढांचे कन्नै जुड़ी दी 6 जहार 600 करोड़ रपे कोला मती लागत दिएं विकास परियोजनाएं दा नीह पत्थर रखगंन ते किश गी राष्ट्र दे नमित करगंन।

मोदी होर चंडीगढ़ दे पोस्ट ग्रेजुएट इस्टीच्यूट ऑफ मैडिकल एजुकेशन एंड रिसर्च च एडवांसड मदर एंड चाइल्ड सेंटर ते न्यूरो साइंसिज सेंटर दा बी उदघाटन करगन।

<><><><><><>

Railway

रेल मंत्रालय नै रेल टिकट बुकिंग गी सखल्ला ते मता सुवधाजनक बनाने लेई भारतीय रेलवे दी IRCTC दी वेबसाईट दा इक नमां सरूप तयार कीता ऐ।

IRCTC ने एहदे च 4 बड्डे सुधार कीते न। पैहला इंदे च फालतू कैप्चा, पॉपअप जा ध्यान हटाने आहलियां दुइयां चीजां नैई न। दूआ यात्री सभ्भनै श्रेणिं च सीटें दी दस्तयाबी दिक्खी सकदे न। त्रीया एहदे च टिकट बुक करने लेई जरूरी स्टैपें दी गिनतरी घट्ट ऐ ते वेबसाईट हून यात्रिं दी जानकारी गी सुरक्षित करी रखोग जेहदे नै अगली बारी बुकिंग करांदे होई सखाल होग ते नमैं सिरिया सारा ब्योरे जा जानकारी दर्ज करने दी लोड नैई पौग।

<><><><><><>

Intl Flight MP

मध्य प्रदेश थमां अंतराष्ट्रीय ब्हाई डोआरी दी सेवा शुरु होई गई ऐ। मुखमंत्री डाक्टर मोहन यादव होरें इंदौर सवा संयुक्त अरब अमिरात लेई पैहली सिद्दी डोआरी गी झंडी दस्सियै रवाना कीता। इस मौके मुखमंत्री होरें आखेआ कि प्रधानमंत्री नरेन्द्र मोदी हुंदा एह मन्नना ऐ कि आम आदमी गी बी ब्हाई यात्रा करने दा मौका थोना लोडचदा ते किश ऐसी बवस्था कीती जानी लोडचदी जे ओहदी थवीक दे अंदर गै ओ इस सेवा गी हासल करी सकै ते राज्य दी सिविल हवाबाजी दी नीति बी उन्दे इस्सै विचार पर

आधारित ऐ। उ'नें आखेआ कि सरकार अंतराष्ट्रीय डोआरिएं लेई हर डोआरी पिच्छे 15 लक्ख रपे दी माली सहायता देग- जेहदे'नें टिकटे दी कीमत घट्ट रखने च मदद थहोग। उ'नें आखेआ कि पैहले जेहड़ा कराया औसतन 24-25 जहार रपे होंदा हा ओ हून घटियै 12 कोला 15 जहार रपे होई गेदा ऐ।

<><><><><><>

Jagannath Yatra

भगवान जगन्नाथ-भगवान बलभद्र ते देवी सुभद्रा हुंदी रथ यात्रा अज्ज ओडिशा दे पुरी च शुरु होआ रदी ऐ। दुनिया भरै च मशहूर इस रथ यात्रा दौरान भगवान जगन्नाथ ते उन्दे भैहन-भाह रथे च विराजमान होइयै शरदालुणं गी दर्शन दिंदे होई श्री गुडिचा मंदर जंदे न- जिसी भगवान जगन्नाथ हुं'दे मामे दा घर मन्नेआ जंदा ऐ। राष्ट्रपति-उपराष्ट्रपति-प्रधान मंत्री ते गृहमंत्री होरें इस मौके पर सब्भनें गी ममारकबाद ते शुभकामनां दितियां न।

<><><><><><>

Shah Jagannath Yatra

केन्द्री गृहमंत्री अमित शाह होरें श्री जगन्नाथ जी रथ यात्रा दे मौके पर देशवासियें गी शुभकामनां दितियां न। अपनी इक सोशल मीडिया पोस्ट पर अमित शाह होरें आखेआ ऐ दुनिया भरै च मशहूर एह रथ यात्रा अनत्रुट आस्था-विश्वास ते भक्ति भावना दी प्रतीक ऐ। उ'नें गलाया कि एह भारत दी सगोसार-सांस्कृतिक विरासत गी संरक्षित करदी ऐ ते भगवान दे प्रति भक्तें दी पक्की ते बेइन्तहा शरदा गी दर्शादी ऐ। इस मौके

पर उनें सब्भनें लेई सुख-शांति-समृद्धि ते खुशहाली लेई कामना बी कीती ते आखेआ कि भगवान जगननाथ सारें पर अपनी किरपा बनाई रखन।

<><><><><><>

US-Iran Strike

अमरीका नै दावा कीता ऐ कि उन्नै होर्मुज जल डमरु मध्य च ज्हाजें दी सुरक्षत आओ-जाई लेई ईरान पर हमले दा इक नमा दौर शुरु कीता ऐ।

अमरीकी सेना दा आखना ऐ कि उन्नै कल ईरान पर दुआ दौर शुरु कीता ऐ जेहदा मकसद होर्मुज जल डमरु च ज्हाजें गी नशाना बनाने दी ईरान दी छमता गी खत्म करना ऐ। राष्ट्रपति डोनाल्ड ट्रम्प इस महत्वपूर्ण समुन्द्री रस्ते पर ईरान दी पकड़ गी कमजोर करने लेई अमरीकी सैन्य अभियान गी बढ़ावा देने दे होरनें विकल्पें पर बी विचार करै करदे न। अज्ज बड़लै बी इक जोरदार धमाके दे बाद तेहरान च ब्हाई सुरक्षा प्रणाली गी सक्रिय करी दिता गेआ ऐ।

<><><><><><>

EAM- FTA

विदेशी मंत्री डाक्टर जयशंकर होरें भरोसा जताया ऐ कि भारत- यूरोपीय संघ बपार ते प्रोद्योगिकी काउंसल दी बैठक भारत-यूरोपीय संघ मुक्त बपार समझौता-FTA-सुरक्षा ते रक्षा सांझेदारी ते गतिशीलता गी मजबूती कन्नै अगड़े बधाग। उ'नें ब्रेसल्स च त्रील्लस भारत यूरोपीय संघ बपार ते प्रोद्योगिकी काउंसल दी बैठक दे मगरा संवाददाताएं कन्नै गल्लबात दौरान एह गल्ल आक्खी। उ'नें आखेआ कि भारत ते यूरोपी संघ बशकार जुड़ाव कुदरती ते स्वाभाविक ऐ ते दवै धड़े इक-दुए कन्नै इस बसाह-भरोसे गी होर

मजबूत करदे होई हून इसी बपार ते प्रोद्योगिकी दे क्षेत्र च बी अगड़े बधाने दे जतन करै करदे न। डाक्टर सिंह होरें आखेआ कि भारत ते यूरोपी संघ “होराइज़न-यूरोप” कार्यक्रम पर बी गल्लबात शुरु करगंन।



Football

फीफा विश्व कप फुटबाल च मजूदा चैम्पियन अर्जेन्टीना ने दुए सेमीफाईनल च इंग्लैंड गी 2-1 कन्नै हराई दिता ऐ। हुन फीफा विश्व कप दे फाईनल च औंदे ऐतवारें अर्जेन्टीना दा मुकाबला स्पेन कन्नै होग। कल खेड्डे गेदे दुए सेमीफाईनल मुकाबले च पैहले Half च कोई बी टीम गोल नेंई करी सकी। दुए हाफ च 55में मिन्ट च इंग्लैंड लेई एन्थनी गार्डन ने पैहला गोल कीता। अर्जेन्टीना दे एन्जो फर्नांडीज़ ने मैच दे 85में मिन्ट च गोल करियै अपनी टीम गी बरोबरी पर लेई आंदा ऐ। फही मैच दे 90में मिन्ट च लौटारो मार्टिनेज़ ने गोल दागियै अर्जेन्टीना गी 2-1 कन्नै शानदार जित दोआई। एहदे शा पैहले अर्जेन्टीना ने 2022 च कतर च विश्व कप दा खिताब जितेआ हा।



Cricket

भारत ते इंग्लैंड बश्कार इक ध्याड़े आले 3 अंतराश्ट्रीय क्रिकेट मैचें दी श्रृंखला दा दुआ मैच अज्ज संजा साड्डे 5 बजे थमां कार्डिफ दे सोफिया गार्डन्स च खेड्डेआ जाहग। एहदे शा पैहले भारत ने बर्मिंघम दे एजबेस्टन च श्रृंखला दे पैहले मुकाबले च मेज़बान इंग्लैंड गी 6 विकेटें कन्नै हराई दिता हा। श्रृंखला दा त्रीया ते आखरी मुकाबला औंदे

ऐतवारें लंदन दे ऐतिहासिक लार्डस मैदान च खेड्ढेया जाहग। भारत ऐल्लै इस श्रृंखला च 1-0 कन्नै अगगै ऐ।

<><><><><><>

Red Fort Closed

80में स्वतंत्रता दिवस समारोह दे सिलसिले च दिल्ली दे लाल किले गी 15 अगस्त धोड़ी आम जनता लेई बंद करी दिता गेआ ऐ। लाल किला परिसर च अजादी दे ध्याड़े दिएं त्थारिं दी पछोकड़ै च भारतीय पुरातत्व सर्वेक्षण मैहकमे नै एह हुक्म जारी कीता ऐ। मैहकमे दे इक बड्डे अफसर ने जानकारी दिती ऐ कि स्वतंत्रता दिवस कोला पैहले हर बरे इस चाल्ली दे हुक्म जारी कीते जंदे न तांजे राश्ट्रीय महत्वै दे इस ध्याड़े गितै सुरक्षा सनें लोड़चदिं सभ्भनें त्थारियें गी बवस्था आहले ढंगै सिर तोड़ चाढ़ेआ जाई सकै। 15 अगस्त गी छड़ा सरकार आसेआ जारी पार्सें दी बिनाह पर गै लाल किले परिसर च दाखल होने ते अजादी दे ध्याड़े दे समारोह च शिरकत करने दी इजाजत होग।

<><><><><><>

IMD-Weather

मौसम विभाग ने अज्ज अरुणाचल प्रदेश-पच्छिम बंगाल दे गंगा कन्नै लग्गदे इलाकें ते ओडिशा दिं किश थाहरें पर बड़ी मती बरखा बरने दी चेतावनी जारी कीती ऐ। एहदे इलावा असम-मेघालय-बिहार-छत्तीसगढ़-झारखंड-नागालैंड-मणिपुर-मिज़ोरम-त्रिपुरा-पच्छिम बंगाल दे तराई आले इलाकें-सिक्किम ते उत्तराखंड च बी अज्ज भारी बरखा बरन दे असार न। विभाग नै अगले 2 शा 3 दिनें दे दरान पंजाब-हरियाणा-चंडीगढ़-दिल्ली-पूर्वी

ते पच्छमी राजस्थान ते पच्छमी उत्तर प्रदेश च दरम्यानं दर्जे दी बरखा बरने दी मेद
जताई ऐ। आंध्र प्रदेश-तमिलनाडू-पुदुचेरी ते कराईकल च अज्ज लू चलने दी शेंका ऐ।
दिल्ली च दिनै दे बेल्लै अद्दे-दुब्बे तौरा पर बद्दल छाए दे रौहने ते कन्नै गर्म ते
उसम भरोसा मौसम रौहने दा अंदाजा ऐ।

<><><><><><>